


KOTAVUSA VIRDA


KOTAVUSA VIRDA VESTASA VA TAMAVA IS ARAYEEM MU AYIKEEM

Teveaksat ke 2023

8^e otuk

Kotava, tela tamefa golerava
Va ina kosmac !!





IZVA IS ARAYA

Kilwa gazaxo, Swahili krimtaxo

Kilwa gazaxo tir savsafo gazaxo idjon ice Kilwa ewala poke krimta (re koe Tanzania) koe Ronefa Afrika, kofeliyiso va kotafo Swahili krimtaxo ba pelava. Tiyr lozolonafu gazaxo ke Swahili arayaxo. Inafa izva kan Ugalay ke Kilwa zo gruper. Bat ugalay gan João de Barros portugalik koe Décadas de Ásia (dem vexala dem nafalik) ba 1552 di zo dimnariyir

Izvafa frofara

Taneafe sane ke Kilwa sedme prostewa tiyd Mtakata az Mranga az tere Machinga ke Mrimba gazik.

Zabdura va gazaxo is kazafa triguca

Bak IX^{-eafa} decemda Kilwa Kisiwani ewala gan Ali bin Al-Hasan dolekik zo luster. Battan ton kazas molt di voner.

Taneaf lizukaf talolk tid evlon gu mon 1200^e ilana ise gan Ali al-Hasan gazik zo kizeyed.



Bak XIII^{-eafa} decemda Kilwa gazaxo va kazara va moava van-burena mal kawoda ke Zimbabwea stujecker.

Inaf gazik wetce lokaf is loneciaf nafalik bak 1331 gan Ibn Battuta zo pimtar. Bat nafalik va tadava soe gizier-dayar ise giguineyer.



Widava va doleks ke Zambia ika indiafa roga is siniafa rigelaxa walziliyir. Mali 1425 prostelayafa mijera va gazaxo sollipayad.

Soe bak XVI^{-eafa} decemda, gazaxo re tir telo logijarotifo ke Zanzibar swaxiliaxo ; inaf wid dere tir tel losposaf is losivakaf, pimtana gu tana widava dem lolistafa kolna koe tamava. Irubasik ke krimtaxo sedme pimtara ke Ibn Battuta arabaf koyasik tid sinkanyan gu kulaf is divepatectaf burmekis is kulupon vagekiranyaf. Kazafa teremta ko tadava loloon kal gola dem uzdapa abdulakid ise va tciamaf doleks divtunseten van asiafa Pokefa Roneka divnarid.

Portugalafa tolgenira (1500-1512)

Bak 1500 Pedro Alvares Cabral portugalik va moneem kum drak pimtar.

Gaspar Correa va widava ba artlapira ke portugalaf totuk ke Vasco de Gama pimtar.

Kotavaf Izvugalayak [-800 – -700 : Taltefa is geefa Asia]

Sinka is Anameda — Irubara is Vegedura — Ckane is Gandura — Yamba is Miga

KURMAFA ROPERA

Kurmik ke Pokefa Lenteka va korik kan wayot mal ruxa giro-payed. Va konaka decemoya akola kagrupeyed, isen kota va dilintyona ropesa savsutura deraykayar. Luxeon dimkivasik foliyid da akola gan lorik ik degrik zo nekiyid nume va akolesik kan diola askipeyed.



Stogoyeks ke vapey icde dimkivasa miga, Babilim, Iraka

WIDAKI TICE BRIA

Urartu gazaxo remi -IX^{-eafa} decemda isu -VII^{-eafa} varone Turka is koe Armena tigiyr. Inaf patectik va folkayenafi widaki tice bria al kolnayad, i widaki broenafi gu veyado is rasekot. Granaf raporaf rebavaxim wan lapted.



Iyekotafa teza va Urartu gazafi widaki, Toprakkale, Turka

Medina wid tir dem rebavega rojuna gu rasek is rotir 12 000 irubasik.

Ontinapafa mona dem azekos is koefa matela kene wwepafa nuda tigid. Anamef tawaday tir dem yona soporafa matela dem jontika aalafa katca isu ruxafa. Molt tir kotraf gu totuk.

Kaliapon portugalik va kazara va moava is oksi is awolba is levetirik getud. Widava bak 1505 taneatomon zo vilar ise bro gazaxoeem ke krimtaxo zo levgar. Quilwa (portugalf yolt ke Kilwa) va culiek pu gazik ke Portugala dodor.

Dim volruptesuca is warzafa triguca (1512-1784)

Mali 1512 arabaf erbudik va Kilwa dimnarid numen wid gin tutrigawemer.

Bak 1606 bal worara ke Gaspar de Santo Bernardino alkik, widava ware tir dem anamefa soporafa matela ; moe ewala plebot is zaday is botada sokatrid isen « Ewalik va coba rotaskina me gruped » ~ in kalir.

Bak 1776 gazik ke Kilwa, Hasan ibn Ibrahim ibn Yusuf, veynazbeik ke persik, pu Morice francik va decitoy levetirik ika voleon 20 *piastre* talolk is 2 *piastre* sotre kot ayik doler. Va mordara antokar.

Felira ke Umana gazaxo azu Zanzibar (1784-1886) az aytcura

Bak 1784 ewala gan gazik ke Umana is Zanzibar zo kofelir. Francik va folk valente ewala banugale vegeud. Wid ilion zo jovler, bak 1840^e sanda.

Mali XIX^{eafa} decemda widava gin tir widama. James Prior englik dakter da « Dum yonara widava ke krimta duvuyuna gu zaskuca is sanelia, ina ticu seltay is triguca is gijarotiuca tit melafokuca is sutuca is nartuca al belxar ».



Yon rawaks
ke Kilwa :
molt, ralma,
folk, migexa



Nuyafa ewava male internetxo :
<https://commons.wikimedia.org>


Internetxo : **Kotava : langue, littérature / ava, suteroteem**

<https://kotava1837481.wordpress.com/2018/11/23/izvugalayak-800-700-taltefa-is-geefa-asia/>

INDARYAFA FELIRA

Kaliafa laumara kesanelia koe bogaf krant ke Ganga bost tiyir nope ikatcura va zadaymidura lidam favera va azilxeka ta basaalara. Ava is araya ke Indarya sane koe kotrafa gola adre al vanikatcuyud.

Kore inafa ota tore al tiyir axafa, voxen sayakafa vamoecu al novoyer da va yona anlizukafa diliokafa sanelia di feliyir. Alaakafa *Mahabharata* ezlapa va sanelia dem tanion indaryik koe Ganga krant roklanon litesir.



Naboxa ke Midas gazik, Gordion, Turka

KOTAWASA KSUBERA

Eylon gu -VIII-eafa decemda, naboxa ke Midas koe Gordion tir tana loon osafa banugale koe Taltefa Lenteka. Gubef wideyik koe dotafo ok yasafo yupxo zo kotawayad, oke olkon vamo ezeba ke mona. Sutik anton tiyid do dul-kafa trocadayxa, solve sersik tiyid do jontika roga is aryona tciamaca, inde kulapafa naboxa ke Assur gazikya kosmayana koe Nimrud koe Iraka dere nedid.



Sulemye, aultdivpaklason ton ruelga is wilsotceson, vanmiae yasa lanid, va Makar is inyone arge pu sulemya zideson is ontinon pulvid. Isen wetce cugafa nyatera, in va kunoy pezay ke ilvultes bresitol koe sumefi mikaci rowir. Sin va fentapaf gael gelavad, ise tegulason va opafa oblaka va beonafa disukera edje libakol debanyes moe vadiminieem keyaksed, kipegason va dempa ke Makar.

Kota batcoba tir slika.

— En tí eglunik ! ~ Makar bocon trakur aze davon djukukser.

Mo nolda senyar.

Fent al tueaftawer. Bocafo afida ke naelot va daruntese randeme anton wan daskid ; remstison va ontinafa vokliba ke aalxo, ton presafa afta va Makar santad. Sumupon, mal Tcalgan, bocafo kro ke biota banliz nemon artstid.

Abicedje, vanawalt teyer, va cugafa nouca artfir aze grirunkawer. Biota amlitad. Azen Makar awalker...

V

Tokinde batcoba al dilizer ? In me al obrar. Gruper da gan koncoba fu zo kounir, nume fure ker... Voxen mecoba divnir...

Neken in va intaf sok sonker : al awalker. Batdume me zekar, zavzar vumeltaf. Jontikedje batinde wan senyar, eke tere argawer.

Orika en dur viele Makar levgon almar da nuganon zo klantar. Takaskarar, gutcfenkur.

Vamoeon, dulkafa is aulafa klupa va gama blagad. Re nutid kinokafa gu facilaca ke darevula. Imkirafa pailta va mantaf gameem besayan gu nolda is zijnon sespawes sotced. Koe alpoz, noldolk yozdad, ton miltafa pibuca lubed.

Vaticu keltgalza, bitejany afif koe orikafe falte va pibafa disukera rem volvunuca ke data gama vankabud ise sugdalad : « Wic, va bat kimtik xonukeyes !! »

Ranyese poke alto ke Makar, platison kan nuga, ayikye tigrir. To Ivan guazaf gertik tir. Inaf trendig is berges gom kum myot is epiteem is lukastap leve nolda griawid. To katcale tir da mil Ivan gertik weti balemde al awalker.

Banugale, bat Ivan tiyir gertikany. Va Makar icde ujazil meviele al olyaster, va erba ta atayera dace me malimaxuyur. Makar va kuba ta ailkera is mistura miv gotuyur, isen re gojon setiker da va itayansa dile ziliyir voxe dere dile me dodeyer. Ivan gertik me tazukorayar. Inafa antafa dinera tiyir : tirac dem lavajeb moe azega ! Ede Makar va erba me dadiyir, pune kle Ivan va

tirac volmiv aneyar, azen sin belcon uliyid. Kotviele gertik valem azega atitsuyur, izakarsaf, voxe vugviele meldayar ; kottode gilaliemeyer. Makar den in dimstayar aze va in volrodefaskis is poiskaf pu kurenik bulkayar.

Gue, Ivan tiyir gertikany. Inafa xonukera tiyir virnafa, soe. Lanviele, cugtan al mallaniyid, isen ant gertikam tigiyr. Ve vikizamayar. Ranyayar, va keldega ardeotason vanlaniyir lize inta ontinon teyeyer. Va plo djuturunkayar ; voxe larde va lavajeb slikote al fixayar, pune me gumilbavaweyer nume ko tey lubeyer. Ba dimlanira, yastik va nimateem ke gertik anton di trasiyid.

Ivan gertikany di zo batcepeyer, voxen larde ant nimateem zavzagiyr, pune mek selaropik va Makar rofraskeyer. Nimateem zo kotawayar, numen ar gertik ika Ivan gertik di zo ikarundayar. Nume to banmil gertik re varanyaf vamo Makar xowar ise kan nuga platir.

— Ranyal, Makarye, ~ kalir, ~ mallanit !!

— Tokliz fu laní ? ~ Makar zunenon erur.

Larde tir awalkeyes, trakur da aulon senyeson gonotigir nume gomemallanir ise ware gomekraber nume koe aalxo vol laxuyeglur. Edevol, tokdume bettan konviele sokawalker ?

— Den Toyon Lorapik lanit !!

— Va tokcoba denon gonaskití ? ~ Makar erur.

— In va rin malyeter, ~ gertikam kalir, ton vanmanana puda skotcesa nope kona tsedara.

Makar setiker da tire kaiki awalkera kottan konliz va int sokatoer aze zo somalyer. Lekeon koe uja va batcoba al mbi kalir. Gertikam kle over, Makar goranyar.

Nume ranyar, tiapudason. Mibuer kire kaiki dace awalkera me zo guaular.

Gertikam kabdueon lanir, Makar kadimeon. Sin ronton lanid, van roneka. Klupa dulkon mangid viele vanmiaolanid ise va keldanya tcalad.

Makar evodanon katcalar da Ivan gertik va meka conyuta ko nolda isker. Bam in va intaf nugeem disuker nume milinde va meka conyuta wir ; nolda wan tir batakafa is gasitafa, dum ploda.

Bata rieta va swava remfir numen in trakur da re va ikse ke artan trabiangon co rovoworar. Metan co sonker. Voxen gertikam va inafa birtafa trakura ape diepiler kire vanon rwoder aze kalir :

— Kabis !! (iskel !!) Me grupel va coba kota milafa trakura nekir.

— Kle, kle ! ~ Makar mevaleaf dulzer. ~ Kas va trakura mbi pou ?! Tokdume re til lieke boksaf ? Kre va int stival !!...

Gertikam takabotcer ise wan lanir.

KLOKARA KE MAKAR

— Kas to jontikedje artlanira tir ? ~ Makar erur.

— Jontikedje, gue, ~ gertikam nigeson dulzer.

— Isen, va tokcoba fu estut ? ~ Makar guyamaf gin erur.

— Kas al vulkul da til awalkeyes ? ~ gertikam rwodeson kalir. ~ Mea godefestul meie godefulil.

Makar vol zo keldaskir. Ape megodefestura tir donaca kase mecoba ta estura zo trasitir, voxen battode ware co gosenyeyer milinde moi awalkera tiyir. Voxen lanira az jontikedje ware lanira, estuson va mecoba, en tir volovopaca. In gire toz tiapudar.

— Ten temel !! ~ gertikam granser.

— Ae, ~ Makar kantan dulzer.

Unt wan tiapugar ise nope solovuca ke bat cobasok ziadger : ayik gonolanir neke pour da rovoltamar. Kas mancoba ixam al zo wir ?

In volaflicer neken va gertik wan radimlanir. Jontikedje ixam lanid. Ae Makar va vanawaltara me kozwir, voxen uldineson kare exuleyena soluma, kare ota ke kaiklanis ecor isu arna isu voa isu uzda isu azeka isu aalxo, mali varafa safta ixam lanid. Kotviele Makar rwoder, pune va orikafo aalxo wir, i va aalxo ilvulteso van zida lize kadimeon meftavapa dem noldarsa silukon griawid, krezeson ko mielak.

Liter da loloon ticlanid. Bitej tupwertawed, tuafiawed. Loon koafid. Taelki kaku xed ke urpena bria awir. Cwe govodotcer. Voxen Makar is gertikam dun vebidud, aze viele mo bata ontinafa azentafa azekexa tere artlanid, pune tael va zida gire toz vamonir.

Re afta dur, ae lopon dam ba mioltoza. Ape kiren tolke poke bitej re tigid. Kot bitej tid pwertaf dum prove is dem mafelafa sizunta. Tael mantaf dum ludev ke moavaf miltuntap, lidam awalt jebed. Bat in va azeka runuarton afiar nume va bet noldolk turowinar.

Data kelda va bata azeka umicad ; kota van roneon milu u vanmilenidad. Moe batyona kelda, koyasik lanis ok lakis dem amidapafe blucte keldonad.

Mali vula Makar va okollakisik rindeper. Levgon bankrileson, vanon vulter.

— Kel !! Vukil !! ~ gertikam iegar.

Makar dace me gilder. Va tatarik dubieyes va dalintaf tolukaf okol weti tevda az diretandon xonukeyes pilkomodar. Glabaf bonol bro tceka gitalayar. Inaf krizeem va goparujod levmadayar lize bitejolya va data jonukafa randesa afiga vanteyayad. Nekev bata dagafa okolvultera Makar akoyenon nuer kane va tatarik lidrikon al lajupartlanir. Ison bantel govovukir vielu va pokon Makar kozwir. Makar tizon powar.

— Den widokilik lanit !! ~ iegar. ~ Bat okol tir ke jin. Inafa ronefa oblaka tir gincakorafa !... Isen va rovuca ke bat ayik wil !!... In moe okol ke artan tigur solve geltraf digisik lanir, dum wipitesik.

— Kel !! ~ tatarik vere dulzer. ~ Den widokilik volfiste di lanit. Bat okol tir ke rin, kalil ? Kle, dimnaril !! Man bonolaj ! Weti ixam alubda moeon lakí neken in tire vol zekar... Kotbet lanisik va jin sokaiklanir, silukon... Batcoba tir kinokucapa tove budaf tatarik.

In ixam toz nimatmadar, tit okol, viele gertikam ilgaelepes artlanir. Va Makar ben nuba vannarir.

— Bonik ! ~ iegar, ~ va tokcoba fu askil ? Kas me wil da tatarik djurester ?

— Anye va jin rester ! ~ Makar mamadason taspugar. ~ Okol tiyir okolany, delaf okol ke tawadayik... Weti ware tolda, va balem-sanoy rubl talolk ikaon mbi firviyí... Me, me, kiewik !... Ede va bonol al emoyal, pune ta atela fu balié... Luxe rin, en kaldodetel... Benje folil da meka mwa kev rin krulder kiren til tatarik !...

Makar ziadger, pudamadason num anamon vancalixatason va jontiktan, kire va cug tatarik gikivar. Voxen gertikam va in azavzar.

— Benje, benje, Makar ! Kle vulkul da til awalkeyes... Kas va okol olegal ?... Kas me wil da loon kalion dam tatarik abdulanil ?... Kas konkase remi data tanda djumel da di govokoyal ?...

Bam Makar vangruper dume tatarik va okol batinde balte xaadar.

— Man korikaj ! ~ trakur.

Van tatarik rwoder.

— Loxe, moe okol mallakil !! azen jin, berye, malyegatá.

Tatarik va edji zideson vanludevar aze va okol nagar. Ban astolewer, frelkasa nolda levu intocka bimiler, voxe liedje Makar is gertik banlize zavzagid, pune tatarik vol abdulakir.

Bantel yatkon putcer, aze gukoeson va Makar :

— Kalickil, dogor (nik), kas konkase va olaxatoa co dadil ? Djuvikizapá, voxe mali balemnda va olaxa mea dadí.

— Vakol sotir rinaf nik, vols jin, ~ Makar zideson vidgur. ~ Benje ! In va jinaf okol dubier aze wori va olaxa roveberur ! Mallakil, roxonukel, vol saatá...

Moi batyona ewa Makar gin lanir.

Klokara ke Makar, ke Vladimir Korolenko (3^e^afa zixa ; diza titisa koe diref otuk)

Klokara ke Makar, berpotam (1885) ke Vladimir Korolenko rossiaf suterotik

Xanto : *Сон Макара*, rossiavon, kalkotavayano gan Mixail Kostov, 2008.

Dotay : Kotavaxak dem Suterot.

Robelin banliz : <https://fr.scribd.com/doc/305871177/Klokara-ke-Makar-ke-Vladimir-Korolenko>

**Caspar David Friedrich (1774-1840) ~ Germanaf lingsik**

Tis feliik ke folvaf patectoy, Caspar David Friedrich (1774-1840) tir tan tegisik ke germanafa pestakeva. Bat milugalik ke Goethe vakorkiron bliyir, dem jontika sugawalkara. Mil yambik kaaneyas va dwonuca, zo grupecker kire va tuwava ton warlaf is swava lum kaatoeyer. To lugoduca lodam listuca koe grabom ke Friedrich tir, sume geltrevaf lizor banugale muxan dene patectoyafa serna koe Franca lodam Engla.

Blirizva

Xantaf gu widavama valente Germana, Caspar Friedrich dene igeltafa dolekikafa yasa koblr. Nekev bata vuxiskuca, gu awalk bak velugal zo ralentar, i gu awalkera ke tela ke gadikya az tela ke konak berik (ke yasa dem 10 nazbeik). Xonukera ke Johann berye tir enfolvafa kiren bantel xonukeyer miledje gu wizuwera koe Balta bira va Caspar giwayar.

Albapas va zovdaropa, Friedrich bas dotaf tavesik raver, i bas tavesik djukastas va ravesik ta lingera koe tuwava. Voxen in koe Danmarka vofackar da di tir patectoyaf lingsik edje dene gazaf yambacultim wali 1794 is 1798 vayar. Va grupera va savsugal raver ise va pofa pulukafa araya malurlicker.



Jotaf lingsik tere gorar da va Dresden koirubar, i va poafa widava icde yamba. Friedrich jupar da kan zovdaks nelkon zo gruper. Gu inyon patectoy kawarzen kan gretcara zo karolar. Nekev kotcoba, kiewatca gaver numen in yonviele miseper ise dace fokser. Va abiccoba warzer.

Zida ke Friedrich tuaftar viele in tir barsandaf. Luxe boda ke Weimar tuke intyon zovdaks mbi gabler. Ba bata katecta va Goethe rungruper nume gan inyona ritetova icde kseva zo turestar. Dum germanaf ezlopik, torigir da tuwava en tir exaksara ke lore. Oxam banugale Friedrich toz linger. Goxe va sugawalk gire levgar, i va awalkera ke gadikye isu tana berikya.

Inaf patectoy tid tcaza ke koefa is warlafa nuera. Yambik tiyir lorbatf ise va jontika kristevafa leca koe grabom kaatoer, vox meviele va ewava va lorik. Sedme in, tuwava tiyir xuta ke rotisa kakevera wal aye is lore. Koredik jontikviele nutid rantaf kabdue cugexuca ke tuwava gijarotion vaxis dile wupesison anamstegesa.

Bak 1810^e sanda, Friedrich va delafa kagrupera seotar. Grabom gan gazik ke Preussena lanote zo lusted. Vanpir bewik ke Cultim ke Berlin azu Dresden. Ostik kurer. Baroy nazbeik doveyon koblid. Inaf grabom toz zo kaaneyad ise koe Rossia zo dotayed. Nekev bata towaranya, volkaluca va in nuvonkar. Nope keravafa litcawalta pakon vicer numen inafa lingsa tegira illaumar. Tevsanalubon awalker. [...]



Recela 6 : Fujisawa

Recela 6 : Fujisawa tir pereafa gweta ke sposaf gwetak vergumveltkiraf gu 53 recela ke Tōkaidō vawa (*Tōkaidō Gojūsan-tsugi no uchi*), zovdayan gan Utagawa Hiroshige niponaf yambik, is taneon piskuyun bak 1833-1834 gan Hōeidō.

Tōkaidō vawa tiyir vawapa wale Edo (re Tokyo) tiso kelu ke Shogun patectokilik is Kyoto gindafu kelu ke Nipona. Sareon gu Hiroshige, kotafa soluma tiyir vas mon 500 km- numen lanis koyasik bad mon toloya safta exuleyed.

Hiroshige va varaf gwetak dem 53 recela ke zalor zovdayar. Bata gweta (*Ukiyo-e tazuk*) tir lumkirafa gu 37 × 25 cm- (ton *Oban breviz*). Tir teveafa ke enk ise va greelt koe Fujisawa kaatoer.

Greelt ke Fujisawa

Fujisawa wetce greelt ke Tōkaidō vawa bak 1601 zo exoneyer. Fujisawa tiyir trigafa widava tuke tigira ke dalafa dopewa ke Ji viray ke niponafa buddeva.

Gweta ke Hiroshige va wida dem za neder. Koe radimazenta Yūgyō-ji dopewa moe venta tigr isen kabdueon torii tuveli dem kelda stasa van Esnoshima tigr. Za gan befoltik zo tervar isen balemoy wiiskik nulanis van Enoshima Benten tumtaxo va sint kene kuksama radimelanid.



Xantofa piskura : 1833-1834 gan Hōeidō



Piskura : Gyosho enk, 1841-1844 gan Ezaki



Piskura : Reisho enk, 1847-1852 gan Marusei



Utagawa Hiroshige lingsik
(1797-1858)

Varaf teliz tigris koe Kotava Xadola dene Wikipedia.

~ Banliz [https://avk.wikipedia.org/wiki/Recela_6:_Fujisawa_\(gweta\)](https://avk.wikipedia.org/wiki/Recela_6:_Fujisawa_(gweta))



TAMAVA IS TAWAVOPA

Montecristo ewala

Tuwavafa fuda koe toscanafa tursia koswayasa va suteroteem is yamba



Montecristo tir italiafa briafa ewalama ke toscanafa tursia, tigisa arte 41 km- gee Elba ewala is 61 km- rone Corsica. Va vunda is stuva al koswar ise re wan tir xo kulafo gu bula, lanon pomano gan tigira mefakafa gu domura is dace worara.

Inaf yolt vas suteroteem tikipir, larde bata cuisafa ewala tiyir koswara va Alexandre Dumas francaf suterotik icde tan grot (Montecristo biptikye): govitafa is amlitafa, tir kotunafa xuton gu birtafa rupa ke bat sposaf berpot.



Tawavopa

Ewala koe dilafa Tirreno bira ke Mediterranea bira tigrise male Corsica ok Elba bal afta a idulbra zo rowir. Tir ki ke toscanafa tursia. Va ezefa tamava nope sumeuca is lae tadler. Ewala tir figafa is govitafa. Tazuk tir vizuaf, ton abrotce vas 4 km- kene lentugefa lya, is ronutalton mante vas 3.5 km-. Welmot tir vas 10 km² is krimtaf anamez tir vas 16 km-. Totara aname ewala vome soluma vas tanoye decitmetre zo zuker. Omega tir gurafo kiriaxo isen ewala anton tir wankafa elega dem ontime vas 645 m-.



Ruxeem is dunoleem ke Montecristo

Jandera koe ewala tir merictana isen worara va suteyena novexa stujepena gan batultik olegar. Mali 1971 tir tuwavafo sulemxo ke vedeyaf gerd ke toscanafa tursia, ise tan lozolonafo remtalaxo isu gelbexo ke lamasi zveri.

Garif irubasik ke bata ewala enwe tid deaxol koplekuyun bak taneafa boniasa rekola, is govitaf libol is tanoya lizukafa zamyalinda. Bato tuwxavafo sulemxo kan febapafa verta zo nendar enide cuisafa bligedruca zo guspar.

Ruxa is aal is sulem moe ewala spon blid. Valey Montecristo zanmyala ixam miwayana, tanoy salmeyafa katca (*Discoglossus sardus*), dere grupena wetce lingkirafa salma ke Tirreno tir lizukafa gu ewala.

Grupeckeno xo tid Cala Maestra vurja dem cuisafa bixefa piludama, is Villa Reale waba dem listafa bliopafa matela is tcilama ke tuwavopafa izva.

Binka male Cala Maestra kal yozoba star, i kal yozoba tisa merofolino wixo firviso va kotniafa wirapa.

1) Ridaf wiks va ewala.

2) Artlapira va ewala.

Vansara va ewala tir mefakafa.



Arula ke Montecristo va konak antorik darekeon bravayad. To bantan va ewala ton « Mons Christi » vey witaft yolt ailkeyed.

Isti XV^{-eafa} decemda, sposaf Barbarossa turkaf tçordik azu Dragut va tucpastaxe ke Montecristo vangiyid ise va vask exoneyed, i va vask kiyis va vunda ke jwa preyutayana koe ewala.

Tire trakut da Dragut tçordik va kulacapa flavayar aze ko lana arula ke ewala konliz palseyer. Darpe yona decemda, jontiktan va kaip ke inyona zierdara lasutrasiyid

voxen metan lajupaskiyir. To bata vunda ke preyutayana jwa va Alexandre Dumas ta sutera va Montecristo biptikye berpot koswayar.

Dumas is Montecristo

Alexandre Dumas suterotik do lane nutikye ke Napoléon Bonaparte bak 1842 va ewala drumlapiyir. Ve korenayar ise trakuyur da ina tiyir « tacukafa is antiafa, kofigayana gu asont is brimuka ».

Drikon rotrakut inde rupa ke berpot moe bata ewala ontinafa gu 645 m- sume tadava va inafa swava kofiyir... To banliz Edmond Dantès gradilikye memalyon zo koflintayar. Banlize va sogzaf dositik tunar, i va dositik razdas va kruldera ke lana jwa koe Montecristo. Div flint lajupotçer aze va jwa trasir aze va semek ke Montecristo biptik luster. Batvielu inafa jaxadara rovotozuwer.

Berpot mali anyusteaksat ke 1844 ton zixa zo sanegayar isen kiewatca tiyir davafa is wintafa.

Lana fuda ile raweyareva is koyutarula

Montecristo ewala tir letaf siday, frofana gan abic susik. Bata tamavafa ribiega gan ayikaf iteem trenon me zo rokarolar, voxen dere batdume dulapera va ina dun vonewer : bulaf tikis gael dace sumuon zo rotseder.

Siday ile boluca lize ugal ton durefa listuca al nutiedeler : to Montecristo ewala.



Rawaks ke savsafe San Mamiliano tucpastaxe



Domus etolam ke ewala



Wiks va Cala Maestra vurja

TELIZ

2^e bu : Kilwa Swahili gazaxo
2^e bu : Kotavaf Izvugalayak
4^e bu : Klokara ke Makar, berpotam
8^e bu : Caspar David Friedrich, lingesik
9^e bu : Recela 6 : Fujisawa
10^e bu : Montecristo ewala
12^e bu : Liwombura
12^e bu : Kuda ke Aisopos

Kotavusa virda

Virda kotavon sanelayana, nuyon is faston
romalvajana is rorubiana is rotamzilina.
Ickriluyun rokeem. PAG / DE.
Internetxo : www.europalingua.eu/KotavusaVirda
Bu : www.europalingua.eu/KotavusaVirda/8-e_otuk_06-2023

Sanegara : Teveaksat ke 2023. 8^e otuk.

Yunkeks is ewava : ewaveem abugaf gu roka ok
nuyon rotamuzen ok rictayan gan digisik.

LIWOMBURA

Tula va liwa ke lana ombaliwa watson gu alto.
Konaka gokosmana peryasafa ombaliwa.
Xantaza :
<https://kotava1837481.wordpress.com/2018/08/26/7-familles-en-kotava/>

5

Loma
BEZA

SULEM

FR
scarabée

Liost



Liost sotir talasa beza. Jontika apta
krulded. In va toloya wiltola sodir : bata
(wiltayeem) va lona sotadler, bana va
talara sonover. Liost sotir divlujatoraf is
zailtoraf.

mical - vebra - nefta - bord - liost - jaya

Taneatomon win wegidol

Viele ayik va wegidol taneatomon wiyir, pune vudeyer nume, pedran gan ontinaltopo, yateyer. Voxe darpeon sonkeyer da in sotir zijnaf, pune tulaoweyer ise vanlaniyir. Azon, vofason da sulem somezider, in vliguyur eke fexayar ise ta jupara pu rumeik nafeyer.

Bata kuda nedir da giltira va kivara ke mayakaca sotuvumeltar.

Kuda ke Aisopos, -VI^{ea}fa decemda (kalkotavaks gan Yurani Andergan)